

आकाशवाणी रायपुर (छत्तीसगढ़)
प्रादेशिक समाचार बुलेटिन
(छत्तीसगढ़ी)

18.10 शुक्रवार

दिनांक 23.01.2026

प्रमुख समाचार –

1— नवा रइपुर म आज ले सुरु होइस साहित्य महोत्सव—राज्यसभा के उप
सभापति श्री हरिवंश ह करिन सुभारंभ ।

2— धमतरी जिला म 47 लाख रुपिया के इनामी 9 इन माओवादी मन करिन आत्मसमर्पण ।

अउ

3— राज्यपाल अउ मुख्यमंत्री ह आज लोकभवन म दसवीं—बारहवीं के मेधावी छात्र मन ल देइन पुरस्कार ।

.....

रायपुर साहित्य उत्सव

नवा रइपुर म आज ले “रइपुर साहित्य उत्सव” सुरु हो गेहे । एखर सुभारंभ राज्यसभा के
उप—सभापति श्री हरिवंश ह करिन अउ कारीकरम के अध्यक्षता मुख्यमंत्री विष्णुदेव साय ह करिन । उद्घाटन
कारीकरम म श्री हरिवंश ह किहीन कि छत्तीसगढ़ म साहित्य के बड़ जुन्ना परंपरा रहे हे । प्रदेश ह अपन संस्कृति ल
सुधर ढंग ले संजो के राखे हे । ओमन यहू किहीन कि देस के आत्मनिर्भरता ले दुनिया ल नवा दिसा मिलत हे अउ
ए राष्ट्रीय सक्ति के पाछु साहित्य के सशक्त भूमिका रहे हे ।

ए मउका म मुख्यमंत्री विष्णुदेव साय ह किहीन कि ए बेरा गणतंत्र के अमृतकाल अउ छत्तीसगढ़ राज्य के
रजत जयंती बछर के हे । इही भाव ले ए उत्सव के आयोजन करे जावत हे । रइपुर साहित्य उत्सव के मंडप मन ल
उन महान साहित्यकार मन ल समर्पित करे गेहे, जउन छत्तीसगढ़ के संस्कृति अउ साहित्य ल नवा चिन्हारी देइन हैं ।

ऐति, उपमुख्यमंत्री अरुण साव ह एला साहित्य के महाकुंभ बतावत किहीन कि छत्तीसगढ़ के माटी ह हिन्दी साहित्य ल आने-आने महान पुरोधा देय हे।

कार्यक्रम म महात्मा गांधी अंतराष्ट्रीय हिंदी विश्वविद्यालय वर्धा के कुलपति डॉ. कुमुद शर्मा के संग प्रसिद्ध रंगकर्मी मनोज जोशी बिसेस अतिथि के रूप म अउ छत्तीसगढ़ साहित्य अकादमी के अध्यक्ष शशांक शर्मा घलो मौजूद रिहीन।

बतादन कि 3 दिन के ए साहित्य उत्सव म कुल 42 सत्र होही, जेमा समकालीन साहित्य के संगेसंग सामाजिक अउ सांस्कृतिक बिसय मन उपर गोठबात होही। ए उत्सव म देसभर के 120 साहित्यकार सामिल होवत हैं।

बातों-बातों में

सुनइया मन ल बतादन कि प्रादेशिक समाचार एकांश के समसामयिक बिसय उपर आधारित कार्यक्रम “बातों-बातों में” ए बखत नवा रइपुर म आयोजित रइपुर साहित्य उत्सव उपर केंद्रित रइही। एखर प्रसारण काली आकाशवाणी केंद्र रइपुर डाहर ले एफ.एम. अउ प्रायमरी चैनल म बिहनिया 9 बजे ले करे जाही। जेला छत्तीसगढ़ के जम्मो आकाशवाणी केंद्र एके संघरा रिले करही।

प्रतिभा सम्मान समारोह

राज्यपाल रमेन डेका अउ मुख्यमंत्री विष्णुदेव साय ह आज रइपुर के लोकभवन म आयोजित कार्यक्रम म बछर 2024 के 110 अउ बछर 2025 के 129 मेधावी छात्र मन ल पुरस्कार देइन। एमा पिछड़ा जनजाति वर्ग के पढ़इया लइका घलो सामिल हैं। माध्यमिक शिक्षा मंडल के डाहर ले “पंडित दीनदयाल उपाध्याय मेधावी छात्र प्रोत्साहन योजना” के तहत ए प्रतिभा सम्मान समारोह के आयोजन करे गिस। ए मउका म राज्यपाल रमेन डेका ह पढ़इया लइका मन ले किहीन कि ओमन धैर्य के संग आगु बाढ़ंय अउ अपन सपना ल पुरोय बर सरलग अभ्यास करंय। ए दउरान राज्यपाल ह नवाचार उपर जोर देवत बिसेस पिछड़ा जनजाति वर्ग के लइका मन के शिक्षा के क्षेत्र म सरलग आगु बाढ़े के उदिम ल गजब संहराइन।

उहें, मुख्यमंत्री ह पढ़इया लइका मन ले किहीन कि तुंहरे खांद म देस के बहुते बड़का जिम्मेदारी हे अउ

सियान मन के आशीर्वाद ले ही ए सफलता मिले हे।

ऐति, स्कूल शिक्षा मंत्री गजेंद्र यादव ह बतइन कि बछर 2024–25 के दसवीं–बारहवीं बोर्ड परीक्षा के 239 मेधावी छात्र मन ल प्रोत्साहन के रूप म पदक, प्रशस्ति पत्र अउ हर लइका ल डेढ़–डेढ़ लाख रुपिया सोज्जे उंखर खाता म डारे गेहे।

पुलिस कमिश्नरी प्रणाली

राजधानी रइपुर म आज ले पुलिस आयुक्त प्रणाली लागू हो गेहे। रइपुर के पहिली पुलिस आयुक्त के रूप म डॉ. संजीव शुक्ला ह कमिश्नर कार्यालय म आज पदभार संभालिन। एखर ले पहिली श्री शुक्ला ह बिलासपुर रेंज के पुलिस महानिरीक्षक, सीआईडी परमुख अउ दुरुग जिला के पुलिस अधीक्षक के संगेसंग रइपुर म ए.एस.पी. के रूप म सेवा दे चुके हे। बछर 2004 बैच के आईपीएस श्री शुक्ला ल उंखर सबले बढ़िया कारज के सेति दू घांव राष्ट्रपति पदक ले घलो सम्मानित करे जा चुके हे।

बतादन कि पुलिस आयुक्त प्रणाली म रइपुर सहर के 21 थाना अउ रइपुर ग्रामीण के 12 पुलिस थाना ल सामिल करे गेहे। रइपुर म पुलिस आयुक्त प्रणाली बर राज्य पुलिस सेवा के अधिकारी मन ल घलो नवा पदस्थापना देय गेहे।

पुलिस विभाग—फेरबदल

राज्य सरकार ह पुलिस विभाग म बड़का फेरबदल करत भारतीय पुलिस सेवा के पंद्रह अधिकारी मनके तबादला आदेस जारी कर देय हे। जारी आदेस ले रायगढ़ के पुलिस अधीक्षक दिव्यांग पटेल ल रइपुर रेल अउ जशपुर के पुलिस अधीक्षक शशिमोहन सिंह ल रायगढ़ के नवा पुलिस अधीक्षक बनाय गेहे। उहें, रइपुर के वरिष्ठ पुलिस अधीक्षक लाल उमेद सिंह ल जशपुर के पुलिस अधीक्षक नियुक्त करे गिस हे।

माओवादी—आत्मसमर्पण

धमतरी जिला म आज 9 झन माओवादी मन आत्मसमर्पण कर दीन। एमा 7 झन माओवादी माईलोगन हैं। ए सबो झन माओवादी मन उपर सैंतालीस लाख रुपिया के इनाम रिहीस। ए सबो माओवादी मन रइपुर रेंज के पुलिस महानिरीक्षक अमरेश मिश्रा अउ धमतरी जिला के पुलिस अधीक्षक सूरज सिंह परिहार के आगु आत्मसमर्पण करिन। ए दउरान सबो माओवादी मन ह अपन हथियार ल घलो सौंपिन। ए माओवादी मन सीतानदी इलाका के नगरी, मैनपुर अउ गोबरा इलाका म सक्रिय रिहीन। एखर मन उपर कतकोन घटना म सामिल रहे के आरोप हे।

आत्मसमर्पण करइया माओवादी मन प्रतिबंधित संगठन ओडिसा स्टेट कमेटी के धमतरी, गरियाबंद अउ नुआपाड़ा डिवीजन ले जुड़े रिहीन अउ बड़का—बड़का पद म रहिके नक्सली संगठन बर बूता करत रिहीन हैं।

संयंत्र हादसा—जांच/मुआवजा

बलौदाबाजार—भाटापारा जिला के धौराभाठा म रियल इस्पात कारखाना परिसर म होय घटना के सुरुआती जांच म सुरक्षा मानक के उल्लंघन पाय गिस। एला देखत कारखाना के परभावित क्षेत्र के सबो कारज ल तुरते रोक देय गेहे।

बतादन कि काली रियल इस्पात कारखाना म बिस्फोट होय ले 6 झन मजदूर के मउका म ही मउत होगे रिहीस। उहें, 5 झन गंभीर रूप ले घायल हैं। घटना के गंभीरता ल देखत बलौदाबाजार म औद्योगिक स्वास्थ्य अउ सुरक्षा के सहायक संचालक ह अधिकारी मनके संग टीम बनाके कारखाना के निरीक्षण करिस। सुरुआती जांच म पाय गिस कि कारखाना म कारज के बेरा मजदूर मनके सुरक्षा ले जुरे नियम ल ताख म राखे गे रिहीस, जेखर सेति ए घटना घटिस। फिरहाल अवइया आदेस तक कारखाना भट्ठी के संचालन बंद रइही। ए बेरा कारखाना म नियोजित सबो मजदूर मन ल तनखा अउ आने भत्तो निर्धारित तिथि म देच ल परही।

ऐति, कारखाना प्रबंधन के डाहर ले मृतक के परिजन मन ल 20—20 लाख रुपिया अउ घायल मन ल 5—5 लाख रुपिया देय के घोसना करे गेहे। एखर अलावा हरेक मृतक के परिजन ल करमचारी क्षतिपूर्ति कोष ले 10 लाख रुपिया अउ करमचारी राज्य बीमा निगम ले पेंशन के रूप म अवइया बछर म कुल 15 लाख रुपिया देय जाही।

छत्तीसगढ़-झांकी

गणतंत्र दिवस ले पहिली कर्तव्य पथ म आयोजित रिहर्सल म छत्तीसगढ़ के झांकी ह अपन बिसेस प्रस्तुति ले सबो के धियान खिंचिस। झांकी म जनजातीय समाज के रहन-सहन, पारंपरिक कला, लोक नृत्य, वेशभूषा अउ बिरासत के झलक ल देखाय गिस। ए झांकी देस के पहिली जनजातीय डिजीटल संग्रहालय के थीम म आधारित हे। झांकी म भूमकाल विद्रोह के नायक वीर गुंडाधूर अउ छत्तीसगढ़ के पहिली शहीद वीर नारायण सिंह के गाथा ल घलो दरसाय गेहे।

रक्षा मंत्रालय के डाहर ले आज नई दिल्ली म राष्ट्रीय मीडिया के आगु छत्तीसगढ़ के झांकी प्रदर्शन करे गिस। बतादन कि एसो कर्तव्य पथ म आयोजित गणतंत्र दिवस परेड म भाग लेय बर छत्तीसगढ़ के संगे 17 आने राज्य के झांकी के चयन करे गेहे।

चित्रोत्पला फिल्म सिटी

मुख्यमंत्री विष्णुदेव साय काली नवा रइपुर के माना-तूता म प्रस्तावित चित्रोत्पला फिल्म सिटी एंड कन्वेंशन सेंटर के भूमिपूजन करही। 100 एकड़ म बनइया फिल्म सिटी म आत्याधुनिक स्टूडियो, स्कूल, अस्पताल, जेल समेत सबो परकार के सुविधा होहीं।

कृष्णा दास-कैबिनेट मंत्री

राज्य सरकार ह मुख्यमंत्री विष्णुदेव साय के नवा सलाहकार आर. कृष्णा दास ल कैबिनेट मंत्री के दरजा देय हे। जारी आदेस ले श्री दास ह मुख्यमंत्री ल मीडिया ले जुड़े बिसय अउ आने बड़का मामला म सलाह दिहीं।

इही बीच, श्री दास ह मुख्यमंत्री ले उंखर निवास कार्यालय म सौजन्य भेंट करिन। ए दउरान मुख्यमंत्री ह ओमन ल बधई अउ सुभकामना देइन।
